

1202

Na osnovu člana 54. stav 3. Zakona o vodama („Službene novine F BiH“, broj: 70/06), člana 30. stav 4. Zakona o vodama Bosansko-podrinjskog kantona Goražde („Službene novine Bosansko-podrinjskog kantona Goražde“, broj: 6/10), članova 18. i 84. stav 1. Statuta Općine Goražde („Službene novine Bosansko-podrinjskog kantona Goražde“, broj: 13/07), Općinsko vijeće Općine Goražde na 18. redovnoj sjednici, održanoj dana **29.05.2014.** godine, donijelo je:

ODLUKU**o odvodnji otpadnih voda na području Općine Goražde****I – OPĆE ODREDBE****Član 1.**

Ovom odlukom, u skladu sa zakonom, definišu se otpadne vode, utvrđuje način odvodnje otpadnih voda, obaveze u vezi sa ispuštanjem otpadnih voda, vrste i izgradnja objekata i uređaja kojima se obezbjeđuje odvođenje otpadnih voda, upravljanje, korištenje, održavanje i mjere zaštite objekata i uređaja za odvodnju otpadnih voda, uslovi i načini davanja usluge, uslovi i načini priključenja korisnika na objekte i uređaje za odvodnju otpadnih voda, međusobni odnosi davaoca i korisnika usluge odvodnje otpadnih voda, način obračuna i plaćanja naknade za dobijenu komunalnu uslugu, način postupanja i ovlaštenja Općine u obavljanju djelatnosti odvodnje otpadnih voda, uskraćivanje komunalne usluge, uslovi i način ispuštanja otpadnih voda na područjima na kojima nije izgrađen sistem javne odvodnje otpadnih voda i nadzor nad provođenjem ove Odluke.

Član 2.

Pod odvodnjom otpadnih voda podrazumjevaju se poslovi sakupljanja iskorištenih voda od priključka korisnika na javnu kanalizacionu mrežu, odvođenje kanalizacionom mrežom i ispuštanje iz mreže, kao i čišćenje septičkih jama.

Član 3.

Djelatnost odvodnje otpadnih voda je komunalna djelatnost.

Uslov za obavljanje djelatnosti iz prethodnog stava je obezbjeđenje jedinstvenog tehničko-tehnološkog sistema (snadbijevanje vodom, odvođenje otpadnih voda) i njeno obavljanje može se povjeriti samo jednom javnom preduzeću komunalnih djelatnosti, u skladu sa Zakonom.

Član 4.

Otpadnim vodama, u smislu ove Odluke, smatraju se vode koje su promijenile svoje prirodne,

fizičke, hemijske ili biološke osobine, rezultatom ljudske aktivnosti, a dijele se na:

- a) Oborinske vode,
- b) Površinske vode,
- c) Otpadne vode koje nisu nastale kao posljedica tehnoloških procesa (vode za rashlađivanje uređaja i sl.),
- d) Sanitarne otpadne vode (vode iz kućanstva, ugostiteljstva, zdravstva, školstva, uslužnih i drugih neproizvodnih djelatnosti),
- e) Tehnološke otpadne vode (koje su nastale kao posljedica industrijskih i drugih proizvodnih procesa, zagađene oborinske vode sa industrijskih, privrednih i drugih površina, uključujući i saobraćajne površine) i
- f) radioaktivne otpadne vode (vode koje sadrže radioaktivne materije, otpatke i sl.)

Član 5.

Sva pravna i fizička lica sa područja Općine Goražde dužna su otpadne vode ispuštati u sistem javne odvodnje, ili na drugi način, u skladu sa Zakonom o vodama Bosansko-podrinjskog kantona Goražde, Zakonom o vodama Federacije BiH i ovom Odlukom.

Član 6.

Odvodnja otpadnih voda mora se provesti tako da ne zagađuje podzemne vode i okolinu u cjelini.

Član 7.

Otpadne vode se iz sistema javne odvodnje ispuštaju u prijemnike: vodotoke i njihove pritoke.

II – OBJEKTI I UREĐAJI: IZGRADNJA, UPRAVLJANJE, KORIŠTENJE I MJERE ZAŠTITE**Član 8.**

Otpadne vode odvođe se putem posebnih sistema, prirodnih vodotoka, te građevina i sistema koji se dijele na:

1. Unutrašnju kanalizaciju i
2. Sisteme javne odvodnje, koji obuhvataju:
 - a) javnu kanalizaciju i
 - b) sistem meliorativne odvodnje.

Član 9.

Odvodni sistemi iz člana 8. ove Odluke izgrađuju se i koriste u skladu sa Zakonom, ovom Odlukom, vodoprivrednom osnovom, vodoprivrednim planovima i drugim aktima koji uređuju djelatnost odvodnje otpadnih voda.

Instalacije, građevine i uređaji za odvodnju otpadnih voda moraju biti izgrađeni po važećim

tehničkim propisima, standardima i normativima, tako da osiguravaju pravilnu odvodnju predviđenih količina vode.

Član 10.

Korisnikom unutrašnje kanalizacije smatra se svako fizičko i pravno lice koje je vlasnik, odnosno nosilac prava upotrebe, odnosno koje upravlja (gospodari) objektima unutrašnje kanalizacije.

Član 11.

Unutrašnju kanalizaciju čine instalacije, građevine, uređaji za skupljanje otpadnih voda iz objekata i sa zemljišta, kanalizacija za odvod sakupljenih voda do kontrolnog okna i kontrolno okno.

Član 12.

Unutrašnja kanalizacija mora biti izvedena i održavana tako da se:

- isključi mogućnost zagađivanja njezine okoline razlijevanjem otpadnih voda po površini, prodiranjem otpadnih voda na površinu ili prodiranjem otpadnih voda u podzemne slojeve,
- spriječi prenošenje zaraznih bolesti i
- onemogući povrat kanalskih voda u kanalizaciju – djelovanjem uspora.

Član 13.

Unutrašnja kanalizacija za odvodnju tehnoloških otpadnih voda mora biti izvedena od materijala koji je vodonepropusan i otporan na kiseline, lužine i temperaturu.

Unutrašnja kanalizacija za odvodnju tehnoloških otpadnih voda mora biti izvedena tako da je omogućeno uzimanje uzorka otpadne vode radi analize njezinog sistema i svojstava iz pojedinih pogona i tehnoloških cjelina, u kojima otpadne vode nastaju.

Član 14.

Tehnološke i radioaktivne otpadne vode smiju se ispuštati u sistem javne kanalizacije ili prirodne vodotoke samo ako su prethodno pročišćene do stepena propisanog važećim propisima.

Svaki subjekat koji ispušta tehnološke otpadne vode u površinske vode ili sistem javne kanalizacije mora posjedovati odgovarajući vodoprivredni akt, u skladu sa Zakonom o vodama F BiH i Zakonom o vodama Bosansko- podrinjskog kantona Goražde. Nije dozvoljena izgradnja privrednih objekata na području Općine bez izgradnje uređaja za prečišćavanje otpadnih voda ili uređaja za smanjenje emisija opasnih i štetnih materija u atmosferu.

Član 15.

U javni sistem odvodnje mogu se direktno ispuštati oborinske, drenažne i površinske vode, te vode koje nisu nastale kao posljedica tehnološkog procesa i nisu toplije od 40 stepeni celzijusa.

Izuzetno od prethodnog stava, u javni sistem odvodnje mogu se ispuštati i:

- oborinske vode s neizgrađenog građevinskog zemljišta i zelenih površina samo preko pjeskolova ili slivnika,
- vode s prometnih površina, samo preko slivnika.

Sanitarne otpadne vode (vode iz kućanstva, kupaoonica, kuhinja, praonica rublja, bazena i sl.) mogu se ispuštati u javnu kanalizaciju ili u vodonepropusnu septičku jamu na cijelom području Općine gdje nije izgrađena javna kanalizacija.

Član 16.

Mjesta na kojima se mjeri zagađenje voda određuju se prema vrsti javnog sistema odvodnje u koji se otpadne vode ispuštaju.

Član 17.

Zabranjeno je u kanalizaciju ispuštati, odnosno ubacivati, komunalni otpad, pepeo, gips, cement, pijesak, platnene krpe, led, snijeg, uginule životinje, kao i sve čvrste i kabaste predmete i materijale, bilo preko unutrašnje kanalizacije ili preko uličnih slivnika i revizionih okana.

Također je zabranjeno u kanalizaciju ispuštati zapaljive i druge materije koje mogu izazvati požar, eksploziju ili oštetiti bilo unutrašnju, bilo javnu kanalizacionu mrežu.

Član 18.

Otpadne vode ispuštaju se iz unutrašnje kanalizacije u sistem javne kanalizacije preko kontrolnog okna.

Kontrolno okno je dio unutrašnje kanalizacije, prije njezinog spoja sa sistemom javne kanalizacije, na kojem se mjeri zagađenje otpadnih voda i smješta se na mjesto do kojeg je osiguran nesmetan pristup.

Izuzetno od stava 1. ovog člana, mogu se ispuštati, bez kontrolnog okna:

- oborinske i površinske vode s neizgrađenog zemljišta,
- oborinske i površinske vode u ostalim slučajevima, koje nisu nastale kao posljedica tehnološkog procesa, ali samo u mješovitu javnu kanalizaciju.

Član 19.

Korisnik unutrašnje kanalizacije dužan je njezine instalacije, građevine i uređaje održavati u ispravnom

stanju, u skladu sa propisima o održavanju stambenih i drugih građevinskih objekata.

Korisnik unutrašnje kanalizacije dužan je u svako vrijeme omogućiti nesmetan pristup uređajima za pročišćavanje i kontrolnom oknu, ovlaštenim inspektorima, te ovlaštenim licima fizičkog ili pravnog lica koje upravlja odvodnim sistemom.

Član 20.

Unutrašnja kanalizacija mora biti priključena na javnu kanalizaciju.

Član 21.

Kad se izgradi javna kanalizacija u naseljima ili djelovima naselja u kojima nije postojala, korisnik unutrašnje kanalizacije dužan je postojeće instalacije, građevine i uređaje unutrašnje kanalizacije prilagoditi odredbama ove Odluke, te se priključiti na javnu kanalizaciju o svom trošku, i to u roku od najmanje 6 mjeseci od dana početka rada javne kanalizacije.

Prije priključivanja na javnu kanalizaciju, raniji korisnik septičke jame dužan je izvršiti njeno čišćenje i dezinfekciju.

Upravnik javne kanalizacije nije dužan izvršiti priključak unutrašnje kanalizacije na javnu kanalizaciju, dok septička jama iz prethodnog stava ne bude očišćena i dezinficirana, što zapisnički utvrđuju komunalni redari.

Član 22.

Troškove izgradnje i održavanja unutrašnje kanalizacije, kao i njezinog priključka na javnu kanalizaciju, snose njezini korisnici.

III – SISTEM JAVNE ODVODNJE I OBAVEZA PRIKLJUČENJA

Član 23.

Javnu kanalizaciju čine instalacije, građevine i uređaji za odvodnju otpadnih voda, od kanizacionog priključka unutrašnje kanalizacije na javnu kanalizaciju do prijemnika.

Otpadne vode se u pravilu odvođe razdjelnom javnom kanalizacijom, tj. odvođe se oborinske vode, površinske vode i vode koje nisu nastale kao posljedica tehnološkog procesa (oborinska kanalizacija) odvojeno od odvodnje ostalih otpadnih voda (otpadna kanalizacija).

Sistem oborinske kanalizacije sastoji se od otvorenih i zatvorenih kanala, slivnika i drugih objekata putem kojih se oborinske vode odvođe u prijemnik.

Izuzetno, mješovitom javnom kanalizacijom odvođe se zajedno sve otpadne vode.

Član 24.

Oborinske i površinske vode s javnih površina mogu se direktno upuštati u javnu kanalizaciju samo preko slivnika sa taložnikom.

Član 25.

Javna kanalizacija mora biti izvedena i održavana u skladu s propisanim standardima i normativima, tako da osigurava odvodnju predviđenih količina vode, a da se isključi mogućnost zagađenja razlijevanjem otpadnih voda po površini, njihovo prodiranje u podzemne slojeve, kao i da se spriječi prenošenje zaraznih bolesti.

Član 26.

Građevinama, instalacijama i uređajima javne kanalizacije upravlja pravno lice kome se povjeri upravljanje javnom kanalizacijom (u daljem tekstu: davalac usluge).

Pravo upravljanja iz prethodnog stava sadrži i obavezu održavanja javne kanalizacije.

Član 27.

Finansiranje izgradnje instalacija, građevina i uređaja javne kanalizacije obavlja se prema posebnom planu koji donosi Općinsko vijeće, u skladu sa zakonom.

Izgrađene građevine, instalacije i uređaje javne kanalizacije investitor predaje na upravljanje i održavanje (zajedno sa kompletnom dokumentacijom, građevinskom i upotrebnom dozvolom) davaocu usluge, i to u roku od 6 mjeseci od dana završetka izgradnje.

Član 28.

Unutrašnja kanalizacija priključuje se na javnu kanalizaciju kanizacionim priključkom.

Kanizacioni priključak je kanal koji spaja kontrolno okno s kanalom javne kanalizacije, odnosno, spoj unutrašnje kanalizacije s javnom kanalizacijom.

Član 29.

Korisnik unutrašnje kanalizacije, odnosno investitor objekta, dužan je od davaoca usluge zatražiti izvedbu kanizacionog priključka.

Uz zahtjev iz stava 1. ovog člana podnosilac zahtjeva dužan je priložiti sljedeće:

- pravosnažno odobrenje za građenje objekta čija se kanalizacija priključuje,
- izvod iz projektne dokumentacije koja se odnosi na kanizacionu mrežu.
- Izuzetno, prilaže se i uvjerenje nadležnog organa da je objekat legalno izgrađen.

Ako su ispunjeni propisani uslovi i uplaćene utvrđene takse i naknade, davalac usluge dužan je bez odlaganja, u razumnom roku, izvršiti priključak na javnu kanalizaciju.

Po završetku izvođenja priključka, davalac usluge dužan je isti ucrtati na karti kanalizacione mreže, uz unošenje ostalih potrebnih podataka.

Član 30.

Priključivanjem na javnu kanalizaciju korisnik, odnosno investitor iz člana 29. ove Odluke, postaje korisnikom javne kanalizacije.

Član 31.

Svaka unutrašnja kanalizacija priključuje se na javnu kanalizaciju jednim priključkom.

Član 32.

Izuzetno od člana 31. ove Odluke, može se odobriti da se jedna unutrašnja kanalizacija priključi na javnu kanalizaciju sa više priključaka u sljedećim slučajevima:

- ako se investiciono- tehničkom dokumentacijom dokaže da je izgradnja više priključaka opravdana iz razloga ekonomičnosti, zbog potreba tehnološkog procesa ili sličnih razloga,
- da se nekretnine s kojih se otpadne vode odvođe nalaze uz okno ili više kanalizacionih slivova,
- ako se na javnu kanalizaciju priključuju unutrašnja kanalizacija stambene zgrade s više stubišta ili više stambenih zgrada građenih u nizu.

IV – ZBRINJAVANJE OTPADNIH VODA NA PODRUČJIMA GDJE NIJE IZGRAĐENA JAVNA KANALIZACIJA

Član 33.

Na području Općine Goražde gdje nema javne kanalizacije, za sakupljanje otpadnih voda moraju biti izgrađene septičke i sabirne jame.

Član 34.

Septičke i sabirne jame mogu se graditi:

- od vodonepropusnog dobro izvibriranog betona MB 30,
- od betona MB 20 s premazom cementnim malterom 1 : 2 (d = 2 cm), uz dodatak sredstava za nepropusnost betona,
- od čelika, s tim da su u potpunosti zaštićene antikorozivnim premazima,
- od drugih materijala za koje treba imati atest o vodonepropusnosti.

Septičke jame i sabirne jame moraju biti izgrađene sa nepropusnim zidovima i dnom i moraju imati zaobljene prelaze između zidova i dna radi lakšeg pražnjenja, te bez ispusta i preljeva.

U slučajevima visokog nivoa podzemnih voda, vanjski sloj oko jame debljine 20 – 30 cm potrebno je

obraditi glinovitim materijalom ili izgraditi drenažni sistem kako bi se evakuisale podzemne vode.

Septičke i sabirne jame sa gornje strane moraju biti prekrivene armiranobetonskom pločom (d = 15 cm), a nad pločom slojem zemlje debljine 0,5 m zbog zaštite od uticaja vanjske temperature.

Septičke i sabirne jame izgrađuju se tako da svaka komora ima otvor za čišćenje minimalne veličine 60 x 60 cm. Otvor se mora graditi sa izdignutim rubom i mora biti zatvoren betonskim ili željeznim poklopcem na preklop. Otvor mora biti vidljiv, tj. ne smije biti prekriven zemljom ili drugim materijalom.

Član 35.

U septičkim i sabirnim jamama tokom procesa truljenja razvijaju se plinovi (ugljični dioksid, dušik, metan i sumpor vodonik), te se one moraju ventilirati kako bi se otklonila opasnost po ljude pri održavanju jama.

U cilju otklanjanja opasnosti iz prethodnog stava (od plinova koji se razvijaju u procesu truljenja), mora se izgraditi ventilacioni otvor prečnika najmanje 10 cm i 3 m iznad površine tla.

Član 36.

Septičke i sabirne jame moraju biti izgrađene na mjestima do kojih je u svako vrijeme moguć pristup posebnim vozilima radi pražnjenja i čišćenja.

U septičke i sabirne jame mogu se ispuštati:

- sanitarne zagađene vode (vode iz domaćinstava i sl.),
- industrijske zagađene vode (vode koje su nastale kao posljedica tehnološkog procesa) i
- radioaktivne zagađene vode (vode koje sadrže radioaktivne materije, otpatke i sl.), samo ako su prethodno pročišćene do stepena propisanog podzakonskim propisima donesenim za provođenje Zakona o vodama Bosansko-podrinjskog kantona Goražde i Zakona o vodama FBiH.

Član 37.

Oborinske i površinske vode, kao i vode koje nisu nastale kao posljedica tehnološkog procesa ne smiju se ispuštati u septičke i sabirne jame.

Član 38.

Preduzeće koje upravlja javnom kanalizacijom prazni i čisti sabirne i septičke jame i odvozi njihov sadržaj isključivo specijalnim vozilima, koja se nakon dnevne upotrebe moraju oprati i dezinfikovati.

Preduzeće iz prethodnog stava dužno je sadržaj sabirnih i septičkih jama izljevati u javnu kanalizaciju na mjestima koja odredi kantonalni / općinski organ uprave nadležan za poslove sanitarne inspekcije.

Mjesta iz prethodnog stava moraju biti odabrana tako da je omogućeno njihovo čišćenje i dezinfekcija, i moraju se nakon izlivanja oprati vodom pod pritiskom i dezinfikovati.

Član 39.

Pražnjenje i čišćenje sabirnih i septičkih jama potrebno je vršiti minimalno dva puta godišnje (proljeće, jesen).

Član 40.

Preduzeće koje upravlja javnom kanalizacijom dužno je voditi evidenciju vlasnika i korisnika sabirnih i septičkih jama i redovno prazniti sabirne i septičke jame prema programu koji donosi, i po zahtjevu korisnika.

O danu određenom za pražnjenje sabirnih i septičkih jama i za odvoz njihovog sadržaja moraju se obavjestiti njihovi vlasnici, odnosno korisnici.

Sabirne i septičke jame izgrađuje, održava i rekonstruira vlasnik, odnosno korisnik o svom trošku.

Preduzeće koje upravlja javnom kanalizacijom dužno je prijaviti komunalnoj inspekciji korisnika koji ne održava u ispravnom stanju sabirne, odnosno septičke jame.

Član 41.

Za pražnjenje sadržaja sabirnih i septičkih jama plaća se naknada čiju visinu utvrđuje javno komunalno preduzeće koje upravlja javnom kanalizacijom, uz saglasnost Općinskog vijeća.

Član 42.

Zabranjeno je ispuštanje otpadnih voda iz poslovnih prostora, domaćinstava, privrednih objekata, gnojišta, septičkih i sabirnih jama na javne površine (ceste, puteve, odvodne jarke, zelene površine), na zemljište u vlasništvu drugog lica, te na vlastito zemljište.

Domaćinstva koja drže krupnu i sitnu stoku moraju imati ograđena gnojišta sa osočnom jamom za prikupljanje osoke (gnojište), čija zapremina omogućava zadržavanje osočnih i otpadnih voda najmanje 120 dana.

V – FINANSIRANJE I NAKNADA ZA KORIŠTENJE SISTEMA JAVNE ODVODNJE

Član 43.

Sistem javne odvodnje izgrađuje se prema planskim dokumentima prostornog uređenja i drugim planovima i programima.

Sredstva za izgradnju sistema javne odvodnje osiguravaju se u skladu sa odredbama Zakona o vodama Bosansko- podrinjskog kantona Goražde i Zakona o vodama FBiH, iz:

- a) dijela opće vodne naknade i posebnih vodnih naknada;
- b) prihoda po osnovu zakupa javnog dobra;
- c) Budžeta Kantona;

- d) Budžeta Općine;
- e) sredstava osiguranih posebnim zakonima (naknada za uređenje gradskog građevinskog zemljišta, komunalna naknada i dr.);
- f) kreditnih sredstava;
- g) donacija;
- h) sredstava pravnih lica i građana i
- i) ostalih sredstava, u skladu sa zakonom.

Član 44.

Za korištenje javne kanalizacije plaća se naknada.

Naknada iz prethodnog stava za odvodnju otpadnih voda iz unutrašnje kanalizacije određuje se prema količini utrošene vode i prema sastavu otpadnih voda koje se odvođe.

Količina unutrašnje vode utvrđuje se putem vodomjera.

Ako na vodovodu nije postavljen vodomjer, količina utrošene vode plaća se paušalno.

Naknada iz stava 1. ovog člana za odvodnju otpadnih voda sa neizgrađenog građevinskog zemljišta, određuje se prema kvadratnom metru površine zemljišta s kojeg se otpadna voda odvodi.

Član 45.

Način i cijenu plaćanja odvodnje otpadnih voda određuje davalac usluge, uz pribavljenu saglasnost Općinskog vijeća Općine Goražde.

Član 46.

Naknada za korištenje javne kanalizacije plaća se od dana kada se korisnik priključi na javnu kanalizaciju.

Obaveza plaćanja naknade iz prethodnog stava prestaje isključenjem korisnika, što se ne odnosi na eventualna potraživanja nastala dotadašnjim korištenjem javne kanalizacije.

VI – POVJERAVANJE OBAVLJANJA DJELATNOSTI ODVODNJE OTPADNIH VODA

Član 47.

Općina Goražde povjerava obavljanje djelatnosti odvodnje otpadnih voda Javnom komunalnom preduzeću „6. mart“ d.o.o Goražde (**u daljem tekstu: davalac usluga**).

Član 48.

Davalac usluga, pri obavljanju povjerene djelatnosti dužan je:

- da obezbijedi vršenje povjerene djelatnosti u skladu sa odredbama Zakona o vodama FBiH, Zakona o vodama Bosansko- podrinjskog kantona Goražde i odredbama ove Odluke,

- da cijenu komunalne usluge obrazuje prema važećim propisima;
- da utvrdi normative rada i utroška materijalnih sredstava i omogućiti kontrolu istih od strane nadležnih organa;
- da uspostavi tarifni sistem koji će biti osnova za naplatu usluga, a koji odobrava nadležni općinski organ;
- da kontinuirano radi na podizanju nivoa i kvaliteta usluge koju pruža i
- da unapređuje povjerene komunalne djelatnosti.

Član 49.

Davalac usluge dužan je pružati usluge koje odgovaraju kvalitetom i standardom visini cijene koju korisnici usluge plaćaju za njihovo vršenje.

Općinsko vijeće utvrđuje mjerila i način formiranja cijene usluge, koja mora biti usaglašena sa kvalitetom i nivoom usluge.

Član 50.

Prava i obaveze između davaoca i korisnika usluge regulišu se ugovorom.

Davalac usluge dužan je ponuditi zaključke ugovora iz stava 1. ovog člana fizičkim i pravnim licima koji su vlasnici, odnosno korisnici stambenih i poslovnih zgrada i poslovnih prostora.

Za lica koja odbiju zaključiti ugovor na zahtjev davaoca komunalne usluge, postupiće se u skladu sa zakonom.

Član 51.

Korisnik usluge dužan je platiti utvrđenu cijenu za pruženu uslugu, u ugovorenom-propisanom roku, kao i izvršiti prijavu i objavu svih promjena u roku od 8 dana od nastale promjene.

Dok se ne izvrši promjena iz stava 1. ovog člana, korisnik koji se trenutno vodi u evidenciji davaoca usluge, dužan je da plati utvrđenu cijenu za pruženu komunalnu uslugu.

O sporovima između korisnika i davaoca komunalne usluge odlučuje nadležni sud.

Član 52.

Usluga se ne može obustaviti, osim u slučajevima kada korisnik:

- izvrši priključenje na javni sistem odvodnje bez prethodno pribavljenog odobrenja nadležnog organa ili davaoca komunalne usluge;
- nenamjenski koristi uslugu u vrijeme otežanog rada javnog sistema odvodnje, o čemu je blagovremeno obavješten na odgovarajući način;
- otpočne sa korištenjem usluge bez prethodne prijave i davanja potrebnih podataka za evidentiranje obaveznika plaćanja kod davaoca usluge;

- koristi uslugu protivno propisima ili ugovoru;
- neosnovano ometa druge korisnike usluga;
- ne plati iskorištenu komunalnu uslugu dva mjeseca uzastopno ili vrati račun za izvršenu komunalnu uslugu bez opravdanog razloga;
- bez odobrenja davaoca komunalne usluge izvrši prepravku ili dogradnju na instalacijama komunalne infrastrukture;
- onemogućiti ulazak radi pregleda zajedničkih i unutrašnjih instalacija ovlaštenom predstavniku davaoca komunalnih usluga, odnosno nadležnom inspektoratu,
- korisnik koji je bio isključen sa komunalne mreže ako se sam ponovo priključi na komunalnu mrežu;
- onemogućiti pregled mjernog instrumenta.

Davalac usluge može uskratiti pružanje komunalne usluge u slučajevima iz stava 1. ovog člana, pod uslovom da to tehničke mogućnosti dozvoljavaju i da se nepružanjem usluge ne ugrožavaju drugi korisnici komunalnih usluga.

Po prestanku razloga za uskraćivanje komunalne usluge, davalac usluge dužan je da, na zahtjev korisnika usluge, najkasnije u roku od 3 dana od dana podnošenja zahtjeva i plaćenih stvarnih troškova za ponovno uključanje, nastavi pružanje usluge korisniku.

Korisnik ne može otkazati korištenje usluge ako to tehničke mogućnosti ne dozvoljavaju, odnosno ako bi se time ugrozio kvalitet korištenja i standard drugih korisnika, te ako bi se time negativno uticalo na okolinu.

Član 53.

Davalac usluge dužan je najkasnije 3 dana prije očekivanog prekida u pružanju usluge, u sredstvima javnog informisanja, ili na drugi pogodan način, obavijestiti korisnike usluge o planiranim ili očekivanim smetnjama i prekidima koji će nastati ili mogu nastati u pružanju usluga, kao i o njihovom trajanju.

Davalac usluge dužan je informisati korisnike o načinu i vrsti obezbjeđenja alternativne usluge.

Član 54.

U slučaju nastupanja neplaniranih ili neočekivanih poremećaja ili prekida u pružanju usluge usljed više sile i drugih razloga, koje davalac usluge nije mogao da predvidi, odnosno da spriječi, obavezan je da odmah preduzme mjere za otklanjanje uzroka poremećaja, odnosno prekida, ili da na drugi način obezbjedi pružanje usluge i da istovremeno o tome obavijesti općinski organ uprave nadležan za komunalne poslove.

Kada nadležni organ iz stava 1. ovog člana primi obavještenje o poremećaju ili prekidu u pružanju usluge, dužan je da bez odlaganja:

- odredi red prvenstva i način pružanja usluge onim korisnicima kod kojih bi usljed prekida nastala opasnost po život i rad građana, ili rad pravnih i fizičkih lica, ili bi nastala značajna, odnosno nenadoknadiva šteta;
- naredi mjere za hitnu zaštitu komunalnih objekata i druge imovine koja je ugrožena;
- preduzme mjere za otklanjanje nastalih posljedica i druge potrebne mjere za obavljanje djelatnosti;
- utvrdi razloge i eventualnu odgovornost za poremećaj, odnosno prekid vršenja djelatnosti i učinjenu štetu, te da preduzme odgovarajuće mjere protiv odgovornog lica, uključujući i naknadu štete.

VII – PROVOĐENJE ODLUKE I NADZOR

Član 55.

Za provođenje ove Odluke odgovorni su općinski Načelnik i Služba za finansije, trezor i privredu Općine Goražde i JKP „6. mart“ d.o.o. Goražde, a nadzor nad provođenjem ove Odluke vrši nadležna kantonalna, odnosno općinska inspekcija.

Član 56.

Odredbe Odluke o vodovodu i kanalizaciji broj: 01-02-445 od 31.01.2012. godine („Službene novine Općine Goražde“ br.2/12), koje su u suprotnosti sa Ovom odlukom, neće se primjenjivati od stupanja na snagu ove Odluke.

VIII – PRELAZNE I ZAVRŠNE ODREDBE

Član 57.

Ova Odluka stupa na snagu po isteku osmog dana od dana donošenja, a naknadno će biti objavljena u „Službenim novinama Općine Goražde“.

Broj: 01-02-1-2405

Goražde, 29.05.2014. godine

PREDSJEDAVAJUĆA VIJEĆA

Jelena Mirković

1203

Na osnovu člana 6. Odluke o utvrđivanju kriterija za određivanje iznosa zakupnine stana na području Bosansko- podrinjskog kantona Goražde za 2014. godinu br. 03-14-612/14 od 29.04.2014. godine i člana 18. i 84. Statuta Općine Goražde (“Službene novine Bosansko- podrinjskog kantona Goražde”, broj:13/07), Općinsko vijeće Općine Goražde, na **18.** redovnoj sjednici, održanoj dana **29.05.2014.** godine, **donosi:**

O D L U K U

o utvrđivanju koeficijenta zakupnine za stanove na području Općine Goražde za 2014. godinu

Član 1.

Ovom Odlukom utvrđuje se koeficijent zakupnine za stanove na području Općine Goražde na kojima pravo raspolaganja ima Općina Goražde, a koji potpadaju pod odredbe Zakona o zakupu stana Bosansko- podrinjskog kantona Goražde.

Član 2.

Koeficijent zakupnine za stanove iz prethodnog stava se utvrđuje u visini od 0,04 za 2014. godinu.

Član 3.

Utvrđeni koeficijent zakupnine služi kao faktor za izračunavanje iznosa zakupnine stana na području Općine Goražde.

Član 4.

Ova Odluka stupa na snagu osmog dana od dana objavljivanja u „Službenim novinama Općine Goražde“.

Broj: 01-02-1-2404

Goražde, 29.05.2014. godine

PREDSJEDAVAJUĆA VIJEĆA

Jelena Mirković